

Stiekel

D'r ston een stiekel in et laand,
vlakbi'j de schoele van Zaandhuzen.
Die hadde last van zonnebraand
en ok nogal van zwatte luzen.

Hi'j kochte dus een zunneschaarm
en een peer grote gifgas-blikken.
Doe hadd' hi'j 't niet meer zo waarm
en leut hi'j al die luzen stikken.

De stiekel wol dat - stark en groot -
vertellen an zien jongste zuster.
Mar och, die lag al daegen dood.
Want kiek, die was miljeu-bewuster!...



Tellen...

Hi'j sleug graeg de haand an de flesse
en dronk dan een borrel of zesse.
De laeste keer kwam hi'j tot elf;
doe sleug hi'j de haand an 'm zelf.



Voegelschrik

Een voegelschrik ston op een arf
in 't westen van Oost-Stellingwarf.
En hi'j beweug gien arm of bien;
de voegels hadden dat al zien.
Ze zeden daorum: „Sakkerloot,
hoe komt die voegelschrik now dood?”


De musken bin d'r henne gaon,
die hebben zeg mar sekteie daon.
Doe vunnen ze een klein rond gat,
dat midden in zien veurheufd zat.
En nao een hieleboel gespit
kwam úút dat gat een kassepit.

D'r was dus - en gien dier verzweeg 't -
gewoon een laffe anslag pleegd!
Et waopen was - dat kon ok best -
lichtkaans een propeschieter west!

Doe het de Hoge Oeleraod
d'r zeuven weken over praot,
of zoks now doodslag was of moord;
ze weugen vanzels ieder woord.
Doe weren ze d'r nog niet uut,
mar kwammen tóch tot een besluit:
zo gauw de daoder pakt was, ging
et deur mit de vergeerding!

Dat pakken mos, mit goed fesoen,
een koppel zwatte kri'jen doen.
Die hadden daor de goeie kleur
en ok de scharpste bekken veur.
Mar ja, d'r is nog niks an daon:
die weren krek in staeking gaon.
Niet om meer loon, as ik 't begriepe,
dát soort staekt inkeld uut principe!

De winterkeuning was de held,
dat wodt deur alleman verteld:
hi'j bouwde him een zoemerhusien
in voegelschrik zien vessebusien!



Husien

Een husien achter Langelille,
dat bleef een dag of viere stille.
Ie wollen weten hóe of wát?
't Volk zat met Wille op 'e brille,
wél Singeliers, mar Zonder Zille,
dus zomar in zien blote dát!



Lekkerbek

D'r zwom een schelvis in de sauna,
die zee: „ik heure bi'j de fauna!”



Mar juffer Aoltien reup: „Ja gek,
die schelvis is een lekkerbek!”

Daor wol ze mit beweren, dat
die vis gien roggegraot bezat!

Veur de reklaome-maekers!

Aj't Stellingwarfs graeg praoten,
dan maj' dat rustig doen.
Dan hoej' dat niet te laoten
uut vreez' veur onfesoen!

Et Stellingwarfs moet blieven!
We willen et niet kwiet!
Gebruuk et in bedrieven!
Toe meensken, schaem je niet!

En leer et ok te schrieven,
dan raek ie d'r mit thuus!
Gebruuk 't veural in brieven
an et Gemientehuus!

Daor zitten Hoge Heren,
die bin van et Bestuur.
Die moe'n de tael beweren,
as pat van de kultuur!

Loop ze mar veur de voeten!
En kiek mar knap gemien!
En vraogen ze waj' moeten,
laot dan je tanen zien!

En zeg: „Bin die niet prachtig?
Hoe speul ik dat wel klaor?
Ik kope me werachtig
vier Jordans in een jaor!”



Schelleboer

We hadden es een schelleboer
- ok vodden en oold iezer -
die leek wel wat op Pelleboer,
mar hi'j was vule griezzer.

Hi'j hadde gien verstaand of zo
van drok- en regenmeters.
Hi'j kwam niet op 'e radio,
hi'j wus wat vule beters!

Hi'j zong zien lied op eigen arf
en wus dan van gien aende.
Zien wereld, dat was Stellingwarf,
dat hi'j zo donders kende!



Hi'j zwurf d'r deur van Oost naor West
en haegel, wiend of regen,
et was 'm allemaole best!
Gien sni'jstorm hul 'm tegen!

Hi'j hadde et vanzels niet bried,
mar kreeg hi'j echt es honger,
dan zat hi'j lachende in 't riet
te visken an de Tjonger.

Zien husien was een gammel krot,
hi'j kon niet meer betaelen.
De deure kon niet iens op slot,
d'r was toch niks te haelen.

Hi'j leek wel wat op Pelleboer,
mar hi'j was niet zo dunne.
Zien bost was bried, zien kop keek stoer;
hi'j was een echte schelleboer,
een schelleboer vol zunne!

Draotien

D'r zat een klein kebooltertien
vlak naost et grote pad.
Dat zat daor op een tooltertien
en schommelde mar wat.

De wiend gaf et een douwgien,
mar evenpies - hiel kot.
Doe brak op slag et touwgien,
't kebooltertien was vot.

Wat is et wieze lessien van
et bovenstaonde praotien?
't Gelok van elke kleine man
hangt an een zieden draotien!



Slange

D'r lag een lange slange
te zonnen in Mildam.
Die slange die was bange,
dat him wat overkwam.

Dus sprong hi'j in een slotien
en ok al klinkt et reer:
now roeit hi'j in een botien
de Kuunder henne-weer.

Zien aktie het intied dus
toeristisch wel sukses:
want now hoeft elke reisbus
ja niet meer naor Loch Ness!



Aende

An alles is een aende,
an alles een begin.
Behalven an de Lende:
die ligt daor tussenin!

Greensgeval	6
Smerig	8
Hogerop	9
Tellen	10
Visker	11
Krobbe	14
Verlotting	15
Hanger	16
Karkepattien	17
Spreekwoorden	20
Doe	24
Grafschrift	26
Eulie	27
Regen	28
Over principes	30
Over Kast	31
Taofel	32
Trukien	33
Over geld	34
Over een spreekster	35
Dichter	36
Vangreel	37
Keunstgebied stokkend? Evenpies bellen 0....-..... . .	38

(S)limmerikkies	39
Stee	44
Mesien	45
Vrije tied	46
Over Grote Naemen	47
Over kiender	47
Stiekel	48
Tellen	50
Voegelschrik	51
Husien	54
Lekkerbek	55
Veur de reklaome-maekers	56
Schelleboer	58
Draotien	60
Slange	61
Aende	62
Inhoud	63

64 p.